



Inatsisartut

Aningaasaqarnermut Akileraartarnermullu

Ataatsimiititaliaq

Finans- og Skatteudvalget

Ulloq/Dato:

4. april 2012

J.nr.:

01.31.06/12-00574

Aningaasaqarnermut Naalakkersuisoq

Aningaasaqarnermut Ataatsimiititaliap suliaq nr. 01.31.06/12-00574 pillugu pingasunngornermi ulloq 4. april 2012-imi aalajangiineranik Naalakkersuisunut ilisimatitsineq.

2012-imiit 2016-imut nioqqutissanik pilersuineq pillugu KNI A/S-imut kiffartuunneqarnissamik isumaqatigiissutip nutaap akuerineqarnissaa

Naalakkersuisut **inassutigaa**,

- 2012-imiit 2016-imut nioqqutissanik pilersuineq pillugu KNI A/S-imut kiffartuunneqarnissamik isumaqatigiissut ilanngunneqartoq akuerineqassasoq.

Aningaasaqarnermut Ataatsimiititaliap oqaaseqaatai

Ukiuni 2012-imit 2016-imut nioqqutissanik pilersuineq pillugu KNI A/S-imut kiffartuunneqarnissamik isumaqatigiissutip nutaap akuerineqannginnissaa december 2011-imi Aningaasaqarnermut Ataatsimiititaliap aalajangiuppaa.

Tamanna tunngavigalugu januar 2012-imi ataatsimiititaliap KNI sassartippaa. Tamatuma kingorna kiffartuussinissamik isumaqatigiissut iluarsisaq pillugu isumaqatigiinniarnissamut Naalakkersuisut KNI-llu eqqissillutik suliaqarsinnaanissaat siunertaralugu kiffartuussinissamik isumaqatigiissutip siusinnerusukkut atuuttup 2012-imi marts ilanngullugu sivitsorneqarnissaa ataatsimiititaliap akuersissutigaa.

Tamanna tunngavigalugu kiffartuussinissamik isumaqatigiissutissatut iluarsisatut siunnersuut Naalakkersuisut maanna nassiuppaat.

Kiffartuussinissamik isumaqatigiissutissatut missingiusiamut siusinnerusukkut nassiunneqartumut sanilliullugu toqqorsiviit, kioskit kiffartuussivittullu pisiniarfiit sivikinnerpaamik ammasarfissaat sivitsorneqarsimapput. Pisiniarfiit marluk kingullertut taasat eqqarsaatigalugit ammasarfiit akunnernit 5-init akunnernut 10-nut aammalu akunnernit 10-nit akunnernut 20-inut sivitsorlugit marloriaatinngortinneqarput.

Kiffartuunneqarnissamik isumaqatigiissutissatut missingiusiamut siullermut sanilliullugu piffissamat kiffartuunneqarnissamik isumaqatigiissuteqarfiusumut tamarmiusumut KNI-mut akiliutaanerussutissat 10,25 mio. kr.-iussapput. Tamatuma saniatigut aningaasartuutaanerussutissanut 6 mio. kr.-it missaanniittunut aningaasalersuutissat suliffeqarfissuup nammineq matussusissavai. Taamaalillunilu ammasarfinnik sivitsuineq ataatsimut isigalugu 16 mio. kr.-it sinnilaarlugit akeqassaaq.

Suliami aalangiinnginnermini makku ataatsimiititaliamit kissaatigineqarput:

1. Kiffartuussinissamik isumaqatigiissutissatut missingiut matumani pineqartoq pillugu

KANUNUPE-p allakkatigut isummerneranik Naalackersuisut piniassasut qinnutigineqarpoq. Allakkat uku akissutaannut ilanngullugu KANUNUPE-p allakkatigut akissutaa ataatsimiititaliamut nassiunneqassasoq qinnutigineqarpoq.

2. Immikkoortoq 1-ip ataani allassimasunut atatillugu e-mailip, Aningaasaqarnermut Ataatsimiititaliamit ulloq 4. april 2012-imi assilineqarnera tiguneqartup, imarisai kattuffiup isummerneranut tamakkiisumik nassuiaasutut kattuffimmit isigineqarnersut aalajangersimasumik allakkatigullu nalunaarutigineqassasoq Naalackersuisut KANUNUPE-mut qinnutigissagaat immikkut qinnuigineqarput.
3. Kiffartuussinissamik isumaqatigiissutissatut missingiusiaaqqartumik tusarniaaneq KNI-p KANUNUPE-llu akornanni telefonikkut ataatsimiinnikkut imaluunniit video atorlugu ataatsimiinnikkut taamaallaat ingerlanneqarsimasoq eqqortumik paasinninnerua? Taamaanngippat – suliamut allakkatigut isummerneq *KANUNUPE*-mit *allanneqarsimasoq* pigineqarpa?
4. Piffissap 25. oktober 2011-p kingorna KANUNUPE kiffartuussinissamut isumaqatigiissummut isummernini allannortippaa, tamatumani telefonikkut ataatsimiinnermi/video atorlugu ataatsimiinnermi apeqqut 3-mi tikinneqartumi missingiummut peqatigiiffik akuersaartumik tapersiisutut oqaatigineqarluni?
5. Apeqqut 4 akuersaarneqarpat, tamatumunnga suna tunuliaqutaava?

Aningaasaqarnermut Ataatsimiititaliap aalajangiinera

Siuliani allassimasutut paasinnilluni Naalackersuisut inassuteqaataannut isummernissani Aningaasaqarnermut Ataatsimiititaliap **kinguartippaa**. Apeqqutinut siuliani allassimasunut Naalackersuisut akissutaat kalaallisut danskisullu sapinngisamik sukkanerpaamik nassiuteqquneqarput assilinerilu uunga nassiunneqarlutik: nch@ina.gl.

Ataatsimiititaliaq sinnerlugu

Andreas Uldum
Siulittaasoq